

四

元覽類藁卷第二十五

查溪齋孫才道行思儀彥校刊

制誥擬詞

祕書監制

帝王之治必有圖籍之藏又擇當世聰明拔出之士聚於其間使得漸磨文學之益獎成其材以待國家之用故書省之設吾不計近功而要於廣畜德所以厚其禮秩而艱於用人庶以明朕好古樂善之勤而勸學士大夫之行也某多識博聞操守純篤諸儒所尚今問惟舊延處茲位蔽自朕知夫尊其所聞而行

之不倦使輔於世教而其効可言非獨優游冊府而已在爾由強以承朕志

著作郎制

麟臺著作之任即以詞學為之必惟其人爾以材選惟能明於理要乃可見於文章其向敏於厥脩朕方觀汝之効

秘書郎制

秘藏四部之圖籍郎所守也職清秩美必也屬之其人爾以材稱俾服茲選尚惟敏於畜德朕方觀汝之能

正字制

是正文字之官實為儒學之選宜體育材之意勉思畜德之勤

殿中監制

分職殿內參侍左右監總六尚之官以供服御之事位視九列禮秩甚優正名之初考擇惟慎某明習吏治勞閱有聞選於在廷俾踐厥任往其祗飭無忘訓詞

殿中丞制

丞於殿內參總六尚之官而察其稽失出於公選首

以材升尚務欽承方勸汝効

太常丞制

丞於奉常參總禮樂之事嗣祝之義惟學古知方乃能不失其守尚務祗飭以服官箴

衛尉卿制

典領宿衛之官地親責重位在九列禮秩甚隆考擇其人屬任惟慎某忠篤謹信濟以材敏周廬屯候之士武庫弓鎧之器往顓總治僉曰汝諧其尚懋哉以祗朕命

太僕卿制

昔曰僕臣正厥后克正蓋親近左右有輔導之義矧車府廐馬牧監之政莫不咨焉非得其人曷稱厥位某材質敏明又更器使司馭之選汝惟克諧其祗厥官以服朕命

大理卿制

折獄詳刑之事朕所重也典領之官位在九列正名之始選用非輕某明吏治通於法令廷尉之任僉曰汝諧往其欽哉以率厥屬

國子祭酒司業制

學校之法雖使之通經術治文字然要其大致則在

於明上之教以導民養人之材以成俗故師氏之位必惟其能其質性粹冲術業通博訓誨之任宜正寵名夫行其所知以先游學之士使風化之出自京師始待爾稱職可不懋哉

太學博士制

博士以文學為官往者列於成均其秩未正朕登之朝序所以尊庠序之教而勵士大夫也爾以經行選用往服厥官蓋尊其所聞以誘率學者汝之守也惟是懋哉

少府監制

百工伎巧之事展采備物之政典領之任位視列卿正名之初考擇惟慎某明習吏治勞閱有聞選於僉言俾踐厥職尚其祗飭以服訓詞

軍器監制

繕治戎械訓工程作之任置監典領禮秩甚隆正名之初考擇惟慎某明習吏事勞閱有聞選於在廷俾踐厥位尚其祗飭以服訓詞

大宗正丞制

司宗之於國族門內之治也然合遠近之屬而齊之有不得專於愛者其於斟酌緩急恩義之際信難處

哉故其屬有丞以參聽其事而交脩其官考擇爾能
俾在茲選夫親九族以刑萬邦此有國之先務也其
體朕心徃從而長服茲是訓以欽厥司

諸丞制

丞於有司參其政事兩察其稽失以材選用尚懋爾
勤

知開封府制

開封府朕建國焉天下所並湊衆大而俗雜尹正之
寄非仁篤公勇材任煩劇不能稱其職今朕脩定官
義正其名號區將考求其實使効見於事則用人

際豈輕也哉某爽邁開達練習治體閱試惟奮功用
顯白處以茲任莫如汝諧夫慈惠足以煦養惇弱剛
嚴足以帖伏奸強然導民之方尚有可識使四方有
以觀則而朕有以仰成在汝勉哉以稱朕命

開府儀同三司制

開府之於榮名重矣矧優其禮命視于三事故其品
為第一所以隆崇大臣古今之通制也朕順于舊典
考正官儀惟是首於文階是用制其祿入秩莫厚焉
非時宗工夫豈虛授某材資繁異識慮閎深莊重足
以鎮浮精明足以成務熙帝之載有贊元經體之庸

提將之符有折衝綏遠之效今百揆攸叙方內靖嘉時乃之功助朕致此是用峻其名秩申此寵章夫褒有功顯有德朕於尊獎近輔之心可謂至矣親百姓撫四夷爾於將順朕志之義可不懋哉尚體至懷徃承厥叙

開封府獄空轉官制

京師天下之聚俗雜五方之民至於智或侵愚強或凌弱巧偽滋出獄訟繁興統理之難為日已久某明敏開達曉習吏事輟自禁近屬之尹正以公於奉上之志絕阿以附下之私摘發姦欺動而必中彈治豪右勇於敢為使縲紲無非罪之嗟囹圄有空虛之效求之近歲罕能及此聞于朕德時惟汝加夫賞所以褒善而勸衆也進官一等疇爾之庸其尚懋哉以求來譽

樞密遷官加殿學士知州制

興國樞要之臣協相帷幄之謀彌綸疆域之事夙夜不懈風力施於省決清明用於思慮蓋勤且煩如是而歷時且久豈朕優禮耆舊之意歟某忠加惠和德操惟邵先帝所遺以輔朕躬當國本兵戾言惟允而屢辭幾政每請彌確志不可易朕所重遠是用改進

文階延升祕殿乃眷東夏處以近藩衍食真封併加
寵數朕於隆崇近輔時其勞逸使得自擇出入之宜
可以為有恩矣爾於廼心王室罔以內外無忘益勵
始終之節其可以不勉哉

侍讀制

蓋用儒學之臣入閣侍讀所以考質疑義非專誦習
而已其列於分職始自開元而朕尤意嚮之其博通
今古服在從官茲選甚高屬爾惟允朕以未聞於文
者究觀前世之變而至夫理亂興壞之際未嘗不反
復焉其悉所知以輔朕志是為爾守其往欽哉

殿前都指揮使制

朕擇材勇之士備宮屯之兵以宿衛京師鎮附方夏
置帥殿陛屬之董齊非強毅忠勞閱試惟舊不在茲
選豈非重歟其篤實沉雄明於策慮護邊制敵身有
顯庸茲用命爾就列大廷典綏王旅建旄立纛為國
藩翰爰田真食並錫寵恩夫兵有擊刺射馭之能有
坐作進退之法教習可以程其技節制可以閑其侮
然能使之合心一力則在知所以附之能使之取威
決勝則在知所以用之審如是焉厥惟艱矣蓋孰之
於易所以圖其難得之於素所以應其變非造刑而

後定計非合戰而後屈人故師飽於逸而朝廷尊馬
肥於休而夷狄叙惟予之武以無敵於四方則爾之
良亦有聞於來世往遵辭訓以服厥官

使相制

在昔大雅所歌成周之盛呂侯申伯並為國藩休父
太師實將王旅出入踐更之雖異中外屏毗而則均
時予宗臣分保近服蓋循斯義以告在廷某精慮造
微翹材絕衆崇論閎議富于文辭強識博聞飽於術
學繇禁林之獻納任廊廟之弼諧浸更歲時休有功
烈而屢形懇請願避煩幾雖敦譬之甚勸顧社稷之

難奪是用錫之士宇寵以節旄視宰路之等威益衆
田之恩數徃釐東夏外倡廢邦予有式群辟之典彝
爾其底迪予有覃四方之德澤爾其布宣以夾輔於
本朝以阜康於生齒配于前哲屬在老成其代天工
矧爰聞於大政廼心王室尚思告於嘉猷

節度使制

有地千里治兵與民內衛京師外拊疆場非文武器
幹望臨一時朕所寵嘉不在茲選某溫良能斷沉靜
善謀直道著於當官周材見於經務承流宣化善政
有聞綏遠折衝壯猷彌顯是用錫之士宇授以節旄

生齒寔繁厲爾以安輯師屯甚衆諉爾以訓齊以作
股肱之良以爲國藩輔之重無忘忠力庶訖外庸惟
亮天功待汝守四方之効無輕民事副予安百姓之
心尚體眷懷豈煩多訓

節度加宣徽制

維昔牧伯長師之官有工與民共于外服所以爲國
藩輔今方鎮之任連數十城之地籍兵與衆而授之
建旄立纛殿于大邦以作衛王室亦惟用稽平古非
文武之特才擅一時孰能稱茲選哉厥有顯庸宜加
寵命廼揚乎號以告庶位某莊毅足以任重肅括足

以提身有能斷大事之明有克勤小物之慎考于僉
議付以成師宣化承流實裨治體折衝綏遠克暢武
經故能紓朕之憂副人之望夫德茂者其賞異功隆
者其報殊是疇其底績之勤錫以宣猷之號揆于常
典非朕爾私蓋位重者其憂深祿富者其責厚名數
禮秩朕旣無忘爾勞功實事爲爾尚協朕之志矧夫
填臨塞路總領兵防班籍聯于輔臣謀畫參于國論
其思勉勵以副眷懷

軍帥制

爪牙之臣典領周衛非特強主威以鎮內外也蓋禮

彌盛者備彌飾上下之節然也則任吾事者豈可以非其人哉某沉勇忠實勞閱有聞蔽自朕心俾供厥服仍遷位等其尚叙承

將軍制

朕有連營列校之衆以宿衛京師鎮撫諸夏能使士齊而奮其惟統督之臣求之在廷其選甚重某忠勇仁厚將以致謀使治吾軍必能副朕所屬今閱士之藝朕皆親臨拔其異能而汰其疲軟其於撫循訓誨之方可謂至矣爾於典領惟公賞罰可以服其心惟篤恩信可以致其力使處則有以養朕之威出則有以揚朕之武待爾任職稱朕意焉

都虞候制

士之以材武宿衛左右者其選甚精而虞度候視於軍中者其任甚寵某忠勇有勞宜在此位進遷使號其往欽承

都知制

門闈房闈之間朝夕給事非謹信忠篤烏可處斯任哉某服勞左右閱歲已深淑慎厥躬朕所考察俾率厥屬往惟汝宜其思永于厥脩尚終綏于榮祿

內臣制

給事長秋服勤惟舊今其老矣思就便安祿爾之勞宜進位等尚思祇服以稱朕恩

責帥制

朕拊士於閒暇之時蓋將責其効也至於臨敵逋亡朕雖假之以恩而將帥之臣則當濟之以肅使紀律章明然後威可勵而士可用也爾握兵之要宜知其職而潰卒之入煦煦受之勞問餉給如勞歸帥使夫三軍之衆將何視焉苟苟簡姑息之心無守正奉公之誼聞外之事朕孰賴哉議罪正刑有國之典奪其近職處以徧州尚自省循茲為薄責

監司制

分部而使連數十城事之與奪吏之緝陟係焉古方伯之任也其選甚重固無假人爾脩繁純明治行強敏刺督之寄往共厥服夫能使政舉刑清和樂交於上下人足家給富饒洽於公私皆汝守也可不念哉

廣西轉運制

自既開百粵而地盡南海提封萬里莫不內屬本朝之制始分桂林以為西部非獨鎮撫吾民亦以綏馭山居谷聚並海之蠻夷故將命而使其選常重爾嘗試而可用是用任屬惟柔遠則能邇其務宣布上恩

輯寧異土無失朕指往欽厥司

蜀轉運判官制

西南之地延袤萬餘里外臨殊俗內雜谿谷諸蠻列
州成縣以保安吾民境大人衆故屬部爲四而利居
其一最遠且險參於使事其選甚高求於在廷是用
屬爾夫保民以仁而懷遠以德茲朕所嚮其往欽哉

轉運使制

國家歲漕東南之粟以實京師故命使部之臣推擇
能吏使度材具舟以濟其役爾應其選歲課甚優是
用遷秩京司以爲爾寵朕於臣下之勤勞甚微且遠
無所遺矣則爾之自効可不勉哉

陝西轉運使制

分部而使兼地數千里治兵與民與夫征賦之出入
自陝以右則又與疆場之事具於寄屬必惟其人察
于在廷無以易爾夫使督課明而政事舉經畫當而
財用足吏與士皆悅而勸兵與民皆贍而靖爾之任
也其尚起哉

提舉常平制一

朕憫農之不易故擇材諳之臣分部四出以平其政
令而佐其衣食之業爾以能聞當是任屬其務知朕

元豐類藁卷第二十五
之意在於惠民往慎厥司慰彼黎庶

提舉常平制二

朕憫夫農之艱且勤故詳為勸助之政又擇能吏分部四出使推而行之爾以材聞預在茲選其思嘗布朕恩使敦本業之民安其田里而足於衣食則爾為能稱其職可不勉哉

元豐類藁卷第二十五

元豐類藁卷第二十六

查溪齋孫才道行息儀華祚校刊

制誥

知州制

昔先王之法導民以德齊之以禮而有耻且格後世不及然破觚以為圜斲雕以為樸禁罔踈闊而吏治蒸蒸不至於姦猶為近古朕甚慕之今能與吾共成此理者其唯循良之吏乎以爾為能與在茲選使刑罰清而風俗美爾能善於其職則明考察而公賞勸朕豈貳於必行其尚自強方觀爾効

知河陽制

盟津冀豫之域背河向洛成臯之間天下之重地也山川之固為國屏翰分土而治非文武之特曷可以當選授哉某以材進拔閱試已孚俾仍近班往祗厥服有生齒之衆屬爾撫和有連營之師待爾綏輯尚茂循良之效庶寬西顧之憂

知軍制

開建城壁本以輯治軍旅今四方既平而假守之臣實任民事列於有土之官矧朔北並邊寄屬尤慎以選擇在茲夫分天能宣其恩威以行禮三人而懷

附異俗則為善核其職尚思爾守無替訓

通判制

州有治中以欲助其長綱紀衆務舊矣今列城之守皆有貳焉蓋亦其任也爾以考擇往祗厥叙尚思稱職以報朕恩

罷館職加官制

夫為官擇人處其名者必任其事而儒館之設有位號而無分職使學士大夫將何以效其實歟是用命爾進階一等而罷其虛稱其有異能朕將明試以功庶爾之材得施於用以成朕招俊又康庶位之意焉

其尚懋哉

賞功制一

王師西封爾能奮勇行陣斬獻首馘稽諸賞典宜進官榮爾尚勉哉益圖來効

賞功制二

擐甲執兵人之重任賞倍而速所以勸功爾爰整我師祖征西土大殲醜類來獻厥俘圖爾之勞進階一等尚思奮勵以侔異恩

團練使駙馬都尉制

大長公主吾姑也位號禮服褒崇光大國有彝章蓋其下嫁必得勳閥之門良能之士然後可以成先愛育之仁而稱朕隆崇之誼某貴舊家子內外行完是用選見于廷命之進尚團兵重任倅馬美名兼而授之蓋稽故事夫恭儉靖慎可以保令問而綏寵祿茲惟朕訓汝尚勉哉

磨勘轉官制一

吏之在位者積歲月之勤應有司之格必有甄進以明勸獎此國家之典也今序爾之勞遷位一等徃恩祇服以稱朕恩

磨勘轉官制二

朕謹名分正官守以董齊百工至其有試用之勞無
踐履之玷則皆稽其歲月法有甄進所以使吾勤事
之更知所勸也今有司比爾之課應於遷格宜升階
品以允新書其服朕恩徃思來効

軍功制一

惟羗稔惡世盜西疆理將殄除內自生變致天之伐
非朕敢私爾躬提偏師摧陷醜類震動河外宣明國
威破竹之功成在旦夕賞不逾月朕尚遲之用遷爾
官以勵衆士能殲大憝當有異恩

軍功制二

河外之地我之舊服羗能靖縱則以昇之今其將亡
自相戕害爰命討伐蓋將天威某沉勇有謀提兵以
出獻俘斬馘屢奏厥功擢進使名以昭信賞能殲首
惡尚有異恩

軍功制三

朕惟羗之猖狂內相賊殺致天之伐爰命六師止除
罪人復吾故地而已爾握兵而出屢以捷聞蓋夫軍
賞之行速則衆勸是用進爾之秩以激士心尚有不
次之恩以待凱還之喜

新及第授官制

朕立學以養天下之材設科以進其造秀之士其於
教導推擇欲成美俗於四方得群能於庶位者可謂
盡其意矣爾以經行文學選自朕躬命以一官將觀
汝效往祗厥叙思稱朕恩

責將制

汝始以微功進朕不次用汝而屬之守邊乃冒吾法
出變夷之中發人採金無出入之籍有侵盜之形朕
惟不欲數使遠人煩於追逮繫獄也寧失汝罪不寃
窮之

堂後官轉官制

吾調兵于外而號令節制之繇中出者汝以宰屢與
於治文書赴期會能辦吾事進秩一等以獎爾勞尚
思恪勤無墜厥守

詔

勸學詔

朕惟先王興庠序以風四方所以使學士大夫明其
心也夫心無蔽故施之於已則身治而家齊推之於
人則官脩而政舉其流及遠則化民成俗常必繇之
古之所以長人材厚人倫者本是而已朕甚慕之故
設學校重學官之選而厚其祿凡欲以誘誨學者庶

幾于古也而在位者無任職之心承業者無慕善之志至於師生相冒挾賂為姦器訟囂然駭于衆聽而况欲倡率訓導洽于禮義磨礱磨礱冶積於人心使方聞修潔之士充於朝廷孝悌忠篤之風行於鄉邑其可得乎朕甚憫焉故更制博士而講求所以訓厲之方定著於令以為學制予樂育天下之材而庶幾先王之治者可謂至矣自今有敦行誼謹名節肅政教出入無悖明于經術者有司其以次升之使聞于朕將考擇而用之以勸于爾衆士有偷懦怠惰不循于教學不通明者博士吾所屬也其申之以誘導使其能有為於志而卒歸於善固吾之所受也子旣明立學之教具為科條其於學者有獎進退黜之格以昭勸戒至於學官其能明於教學而詳於考察有得人

勸農詔

夫農衣食之所由出也生民之業莫重焉一夫之力所耕百畝養生送死與夫出賦稅給公上者皆取具焉不幸水旱螟螣之菑徃徃而有可謂勞且艱矣從政者知其如此故不違其時不奪其力以使之明時

曰析以授之差地之腴瘠以處之春省耕秋省斂以助之詩曰盭彼南畝田畯至喜言上所以勞之也又曰駿發爾私終三十里言上所以勸之也其獎勵成就之者如此朕自承天序內重司農之官外遣劭農之使爲之弛力役均地征修水利或一雨愆期則憂見於色或一穀不成則爲加惻怛有復除之科有賑恤之令夙夜孜孜焦心勞思者凡以爲農也今耕者衆矣而尚有未勉墾田廣矣而尚有未闢豈拊循勸率有所未備欵抑吏怠而忽不能宣究歟有司其於農桑之務益思所以除害興利詔令已具者宜亟墾所未盡者勿憚以聞要使緣南畝之民舉忻忻然樂職安業洽於富足稱朕意焉

正長各舉屬官誥

蓋聞堯之治曰百姓昭明舜之治曰四門穆穆然則當是之時在位皆君子其是非不惑可知也故堯欲釐百工舜欲熙帝載求可任者皆訪諸四岳因四岳以命禹又因禹以命稷契臯陶因羣臣之臣僉曰以命垂益伯夷因伯夷以命夔龍其審官用賢不自任其聰明而稽之于衆如此然存於書二帝所命者羲和九官十二牧皆官之正長也至於屬官則未有二

帝嘗命之者其遺法之可考則周穆王命伯景爲太僕正戒之曰慎簡乃僚無以巧言令色便辟側媚其惟吉士則自擇其官之屬者官之正長之事此先王之成法也漢魏以來公府郡國亦皆自辟其屬而唐陸贄請使臺省長官自擇僚屬蓋上下之體相承如此以周天下之務此古今之通理也今朕董正治官始自三省至于百工皆正其名夫使在位皆君子而非不惑此朕素所以厲士大夫也故凡官之長貳朕旣考擇而任之尚書政本也自郎已下用吏甚衆僕射左右丞尚書侍郎各於其所部員有未備

皆舉二人以聞朕將擇而用之其未用者亦識其名以待用朕稽于古以正百官稽于衆以求天下之士其勤可謂至矣惟官之長貳之臣皆朕所屬以共成天下之治其尚體朕意所舉惟公以應朕之求所陳惟實以嚴朕之詔其得材失士有司其各以等差具爲賞罰之格朕將舉而行之賞吾不恪罰亦無捨非獨搜揚幽滯庶幾爲官得人亦將以觀吾大臣之能使朕得與衆士大夫合志同心以進天下之材作則垂法行之于今以詒後世追于先王之成憲無令唐虞有周專美于古不其美歟咨爾庶位其諭朕意一作

懷

賜高麗詔

蓋聞在昔夏后分天下爲五服地有遠近故治有詳略而聲教之盛東漸于海朕甚慕之顧德不明何以逮此而爾東國之君欵誠內附數遣使者乘不測之川獻其方貢惟爾之義朕實寵加宜有異恩以稱勤恪而爾比緣養痾以醫爲請眷然東顧朕預憂之是用擇遣方技之官具舟以往爾惠彼一方神明相祐藥劑所補以時康寧達于予聞欣慶方屬而遽馳條從來致謝章覽以慰懷獎勸良厚爾乃自祖以來又彼土其尚願精神強飲食格于厝壽以均福于衆使爾有世濟其美之功而朕預聲教及遠之休其始自今永孚于好

策

擬代廷試進士策問三首

策問一

朕有志於卑漢唐之治而欲比迹於唐虞三代之盛故於書無所不學而通其意於天下之事無所不講而極其本末於人之材長養成就之者甚厚求而用之者甚至於民之務憂勤思念者甚詳撫而綏之者

甚力患風俗之敝也正已以先百姓而明於教示患
政理之陋也稽古以定制虔而謹於持循欲斥大疆
土也勞於經武欲懷附夷狄也廣於推恩人之所欲
者不敢違人之所惡者不敢強賞不敢以喜而濫刑
不敢以怒而淫群臣之進對者夕請而朝見之四方
之奏事者旦入而暮報之未嘗有聲色之娛未嘗有
畋遊之好不營宮室不崇苑囿衣服飲食取具而已
兢兢業業不敢暇逸日慎一日十有六年于茲矣惟
先聖王之烈雖自視歆然察其用心如朕者亦可以
無憾矣然古之大有爲之君必有大效於天下至於
小能小善亦各有小補焉奚獨至於朕也意彌簡而
功未見於人行彌勵而德未見於世豈所謂是者非
歟所謂能者否歟抑所行者爲可止歟所舍者爲可
用歟將在位者奉承法令苟爲空文而不務究宣朕
意歟意者今去古遠先王之政不可以復歟凡朕之
所爲繇前者其失安在宣於今者先後施設其要如
何唐虞三代之所以成功德者孰近於今可推而行
之漢唐之卑者孰存於今可革而去之其悉心以對
朕將自擇

策問二

夫有二南之化則有羔羊之大夫兔置之士廣漢之
女其成人之材則見於思齊其成物之性則見於行
葦蓋王者之治繇近及遠其效如此何其風俗美而
流澤深也今朕躬禮義以先天下恐其未諭也崇庠
序以導之縻一作靡爵賞以勸之患其未從也以政率
之以威董之可謂盡心矣然朝廷之臣未能有素絲
之節正直之行中林之士未能有慎獨之心女子之
誼未能有翹翹之絕况於有德有造成人之材牛羊
勿踐遂物之性可望其髣髴乎朕於士民憊精刻行
克意以待其善而天下靡靡便文苟偷而已何其習
之難變也夫先王之教其本豈易於身先之其具豈
易於崇庠序縻爵賞修政刑以將之與今之所務者
同也然以今方古違從之效異何也豈今之所知者
不明所尚者不審歟抑人散久矣不可以復化歟子
大夫待問于廷其以經對

策問三

朕獲承祖考懼德不明故小大之事躬親省決以夜
繼日不敢自暇而政未加善側身踐行兢兢業業不
敢自逸為天下先而俗未加厚崇庠序之化信賞罰
之法以開導而士未加勵憫農惠商補其乏闕除其

疾苦以勸助而民未加富礪器械教士卒所以經營之者甚具而武事未立也定制度正官號所以彌綸之者至備而文治未洽也至於百工未昭彝倫未叙四民未盡得其職萬物未盡遂其性中國之勢或詘於夷狄九州之地未一於舊服是一皆戾古豈朕之不敏所知者非其要所繇者失其統歟抑群臣之在事者不稱其任不能輔任歟將乖繆之習久更革損益之始其功難見歟朕之待物者未嘗不以誠而下之應上者皆文具而已是何故也意朕之所為與古之所以致治者無異而其效之不同何也二帝三

代以來迄于唐及五代雖功德有間然其所以洽且昌與夫所以衰亂失之者其跡可考其原必有在方其治且昌也所繇之路本末先後其一致歟抑有殊也其衰亂失之也浸漸積累所以致之一揆而已邪抑不然也知古今明治亂予大夫之職也其具著于篇朕將親覽

類彙卷第二十七

查溪裔孫才道行思儀彥華柞校刊

表上

謝中書舍人表

伏承制命授臣試中書舍人者甫上程篇遽塵寵任
載惟遭遇倍集兢慙中謝蓋聖君難諭之情將欲施
於號令得當世能言之士然後達於文辭矧今綱理
四方彌綸庶政肇惟新之王度備久簡之官儀計謀
常越於拘攣注錯舉爲於希闕豈伊凡庶可測高深
方當覺悟邇遐使徧知於上意訓齊內外用丕變於

群心允資演暢之材曲盡丁寧之旨布爲邦典茲謂
人文顧在臣愚豈堪此選伏惟皇帝陛下超逾千載
特起一時躬堯帝之聰明而不忘講學集成湯之勇
智而無勸咨詢惟左右前後之臣有耳目腹心之寄
允非淺識所可叨居如臣性實滯蒙器非廣博知自
強於名節耻陰附於貴權無回綠毫髮之扳援有積
累立山之忌嫉晚逢睿聖獨賜收憐褒加特異於常
倫進用每從於中出猥以五朝之大典屬於一介之
孤生已愧缺然將安稱此敢期誤寵仍寘近班敷護
訓辭懼空疎之難強追參諷議憂蹇淺之易窮於風

波流落之餘以蒲柳衰殘之質自循涯分曷副恩榮
雖日月之光何加於潤色而天地之德無待於論思
然臣素堅好古之誠粗識愛君之義旣抗顏而就列
敢恕已以懷私謹當尋繹舊聞用闡揚於名俞激昂
懦志庶補助於謀猷仰答主知誓殫臣節臣無任

齊州謝到任表

伏奉勅命就差知齊州軍州事已今月十六日到任
上訖顧以諸生備茲煩使據非其所懼不克堪中謝
伏念臣素乏他長偶知好學議先王之制作嘗窺本
原論夫子之文章頗探閩奧歷事聖君於三世與游

儒館者十年不知苟曲以取容但信朴愚而自守比緣私計請貳外藩嗟疾病之餘生困米鹽之細務方指期於滿歲將垂翼於故棲遽此外遷處之劇郡維殷陽之列壤實季崩之遺區習詐而夸著流風於在昔多盜與訟號難治於當今比試用於此邦必咨求於強吏蓋因能而任官者不違其分則量力而受位者得竭其材豈使儒懦之資可副浩煩之用恐殫精思無補毫分然而繇積累以冒恩實養成之有自此蓋伏遇皇帝陛下智周萬物明照四方在踈遠迂腐之中而察其所守無左右遊談之助而知其所長故公覆露之仁及此滯蒙之質敢不無忘夙夜勉盡疲行歸于周久自安於直道老當益壯誓無易於初心仰望闕庭臣無任

襄州到任表

伏奉勅命就差權知襄州已於今月二十七日到任上訖緣同氣之私恩陳便親之微志就更善郡得侍安輿中謝伏念臣素堅向學之心幸遇好文之主備名儒館十有三年然而三易外邦五回星歲比亦再過於雙闕未嘗一對於清光常存傾藿之誠雖知向日君有戴盆之勢何以望天而臣昨治濟南最爲煩

劇野有群行之盜里多武斷之豪馴致肅清始熄凶
殘之害自強柔懦頗殫竭感之勞今者或就安閑少
休疲鈍出觀美俗尤多漢廣之高入奉慈顏不憫汝
墳之瘁茲為竊覓厥有端原此蓋伏遇皇帝陛下獎
引士倫推崇世教小藝片言之善偏長一曲之材皆
欲養成未嘗棄廢故令優佚俯及孤蒙敢不附慰此
民宣明上德永念沉碑之舊自顧何功未忘投博之
勤庶幾小補臣無任

洪州謝到任表

伏承勅命就差臣權知洪州軍州事充江南西路兵

部鈐轄已於本月二十四日到任上訖撫臨便
奉於親闈總制屬城寔蕪於故里中謝伏念臣志
雖擇善材不過人玩思詩書無出倫之異見遊心翰
墨多涉俗之塵言竊食累朝備官儒館智非早悟曾
不習於人情學匪兼通固難堪於世用茲緣私請得
假善藩惟八換於歲暮已四臨於外服幸遇非常之
主未奉燕閒實當難得之時獨無稱效儻獲伸於肝
膈冀少益於毫分伏惟皇帝陛下恭儉愛人聰明好
古卑漢唐之近事慕堯舜之遠圖臣敢不上體聖心
勤脩民政奉行寬大方盡瘁於茲時補助高深庶納

忠於來日仰望旒宸臣無任

福州謝到任表

伏奉勅命授臣守本官直龍圖閣就差權知福州已於今月初九日到任上訖列職內朝分符督府荷收憐之俯及省孤陋以何堪中謝伏念臣蹇薄多艱慙愚少與遇繼承於興運未進望於清光至於九換歲暮常從外徙四臨州部曾未代還茲者備延閣之美名假東甌之劇郡顧惟同氣亦預改藩但虞人品之輕莫稱主恩之厚然臣最為寒族實奉備親臣第就適於遐陬臣愚固難於遠役理當懇請報奉冒聞

命之恭惟皓首之慈闈抱累年之宿疹牽未辭訣泣涕分馳計音信之往來殆將萬里阻晨昏之定省各在一涯足感動於人情況親逢於孝治草茆弱質素依及物之仁犬馬微誠終冀因心之恕再念臣撫臨城邑勞問上民皆狎處於太寧但遵行於明詔則臣實慚尸於廩食曷補報於寵靈皆出誤知致思冒處伏惟皇帝陛下多能天縱盛德日新躬神聖之姿而兼容小善履富貴之極而深達下情在於隱恤之心豈間么微之跡敢不誓殫勤瘁匪懈夙宵懃海徼之

幽荒布德音之寬大承流寵寄方自效於驅馳反哺
愚情冀尚蒙於憫惻仰望旒宸臣不任

明州謝到任表

臣於去年十二月於江寧府准福州公文送到勅
一道就差臣權知明州當月十八日於兖州據進奏
官狀准中書札目房帖于臣乞迎侍老母赴任不行
已於今年正月二十五日到任上訖預於分土愧在
假人竊自省循懼無報稱中謝伏惟皇帝陛下有聰
明睿智固天縱之高姿有恭儉慈仁不世出之琦行
上嘉堯舜之際下悼漢唐之間以超曠之迹爲可追

以苟簡之治爲無取甚盛德之事敏於絕倫大有爲
之君審於在已所以更張廢政憂憫百姓之心至於
推廣大恩鎮撫四夷之略無忘夙夜匪懈斯須其志
之所存則有孔之卓其行之以力則有禹之勤若夫
甄序群材蒐揚衆論一作長一曲之善半辭片說
之工遠自巖穴之幽深旁暨草萊之踈賤莫不從容
賜對以盡其情委曲因能以收其用可謂三代以後
特起之盛時千載以來幾希之嘉會而臣濫中臺之
優秩玷內閣之美名然而荏苒十年周流六郡當陛
下闢四門以延天下之士而臣未得一望於清光遇

陛下開數路以來天下之言而臣未得少陪於末議
蓋茲遠跡最爲多竒故雖抱於愚忠每自安於靜晦
竊恃皇明之必照終期素蓄之獲伸昨者爰自江吳
就更閩粵喑有畏塗之阻藐無將母之因賴上威靈
致寇攘之熄滅屬時休慶獲稼穡之豐登旣此蒙城
且將滿歲輒露由衷之請果紓及遠之仁召自天涯
還之闕下已慰循陔之念更諧拱極之誠方攬轡以
在行復分符而補外維鄞江之列壤寔浙右之名邦
素號寬閒可容尸素尋敷陳於奏牘冀迎奉於輕其
紆是微情未回洪造已宵行而祇命甫夕揚以堂
春是遐陬邁此昭且來廷之國實爲出入之途
之城方始經營之緒仰荷選掄之寄敢忘策勵之勤
矧皆稟於成規庶可圖於薄効再念臣比更遠守久
去偏親出自推恩幸茲易地環走已臨於新部相望
猶邇於舊封仰晞天日之光未親戶牖俯計晨昏之
恣尚囑庭闈眇是羈單了無黨助每益堅於已志獨
有待於主知自効驅馳敢廢資忠之義庶依長育未
愆致養之私傾葵藿之一心極蓬茆之丹懇論疇有
在之死無渝仰望冕旒臣不任

亳州謝到任表

伏奉勅命就差權知亳州軍州事已於本月十六日到任上訖比從閩粵中易句章益起堅城以強表海之勢闕開列館以待來廷之賓皆承規畫之餘方始經營之緒程工省費俾無靡敝之材計力與庸俾無發召之役以至屬材能而董事分什伍以庀徒已略具於料條可粗施於士吏身方督作匪懈於服勞法有避親遽蒙於易地竊陪京之寵寄申將毋之微情輒冒恩榮何堪報稱中謝臣竊觀前籍所載千載以來大道鬱而未彰莫承于古王者疏而不作無甚茲時在理可推久衰必復去五代八姓寢微之弊肇自

宋興承一祖四宗丕顯之謨實在陛下蓋繇體粹精之睿質執剛健之純誠運獨斷之明則天清水止昭不殺之武則雷厲風行故能並起百工越熙庶績追二帝三代之甚盛行兩漢有唐之所難使天地人神莫不順序雨暘寒燠罔或違時厥戴德者田耕井飲之倫蓋游泳於遐邇之內其蒙澤者蟄階姬伏之類無殞殍於胎卵之中寶鼎靈芝聲流於樂府來蕤嘉穀實切於太倉至於武庫斂藏之兵羽林閱習之伎匠盡其巧而工妙擅於一時士盡其材而精銳軼於近代威靈所覆夷貉允懷是以扶桑戴斗之區度索

尋撞之國來於四海之外曾無一歲之虛蓋今不待
期而萬里奔走治非有跡而九域阜安可謂不世之
宏休難名之盛烈夫應之福者既極其厚則報其貺
者必盡其隆方當秩盛禮大樂之文薦諸清廟采增
封廣禪之義類于名山於以較著日新拔出之顯庸
闡布天錫永昌之大業臣性姿固塞人品眇微獨於
輦流素嗜文學如得鏤諸金玉述陛下赫赫之功播
在筦絃紀陛下巍巍之德措之六藝而無愧告諸百
世而無疑庶幾不後古人可以昭示來者存於肺腑
積有歲時然臣籍雖預於內朝身屢更於外服已彫
之於齒髮久轉走於東南曾未得廁望塵於清廟之
間參第頌於從官之後惟堅悃悞欲効毫分今者得
便養於親闈預分憂於輔郡上體焦勞之意敢忘夙
夜之勤宣化承流方盡駑駘之力望雲就日但傾葵
藿之心注仰冕旒臣無任

賀熙寧四年明堂禮畢大赦表

今月十三日樞密院遞到赦書一道以宗祀明堂禮
畢大赦天下臣已即時集軍州官吏將校等宣布訖
伏以奉承聖考升配上天秩盛禮於法宮推大恩於
率土中賀伏惟皇帝陛下有聰明好古之質有恭儉

愛人之誠兢畏萬機仔有一德燔柴展報既昭告於
元功嚴父致隆又推明於極孝越成釐事均布鴻休
草木昆蟲皆令受賜華夏蠻貊莫不歸仁臣心係北
辰身縻東土未懷故事難求汶上之圖獨遠清塵方
嘆周南之滯想望旒宸臣無任

賀熙寧十年南郊禮畢大赦表

今月初七日遞到赦書一道以十一月二十七日南
郊禮畢大赦天下者臣已集軍府官吏將校軍民等
宣讀訖伏以人之所歸者莫如德天之所享者在於
誠其惟聖王克有全美中賀伏惟皇帝陛下聰明

古承繼祖宗慈惠愛人撫臨邦國者有徧覆并容之
大度有防微慎獨之小心不從遊畋不近聲色無紛
華盛麗之好無便僻側媚之私歲時吉蠲以承七廟
左右順適以奉兩宮其功施於人効見於事則宅仁
由義搢紳之徒成材於學校超距蹋鞠熊羆之旅養
勇於營屯甌窳汚邪之收充於倉廩關通和鈞之利
阜於市廛家有豫樂之聲人無愁怨之色協氣所召
休應自殊鈞陳太微星緯咸若崑崙渤澥波濤不驚
近則金石之聲一作音鳥獸忻蹈遠則干羽之舞蠻夷
駿奔象齒旅於闕廷龍媒納於閒廐是謂六府三事

皆可以謨四海九州罔不率俾蓋巍巍而特起非瑣
瑣之能闕前世議泰山之封謀梁甫之禪者度崇比
大疇克登茲陛下抑而不圖謙以自牧以謂先后作
王創業垂統其功莫得而名上帝隕祉發祥其德無
可以稱思所以報一本於心故寅畏嚴恭積之有素
而齊明薰拔進而益虔在於物者不取其煩盡諸已
者必求其實是以蕭光之烈奏於宗枋柴燎之蒸焜
於郊兆幽隱昭答神靈顧懷無疆惟休方寢昌於萬
世不敢專享故敷錫於群元稽參典彝定著赦令弛
張從理同異稱情蠲罪責而棄瑕疵錄勞能而縱逋
負顯晦咸暨洪纖不遺萬國之歡既交於冲漠
之慶遂及於蛟螭乎于上下之間極乎帝王之盛臣
被學最舊蒙恩寔深莫侍甘泉之祠獨嘆周南之滯
第從臣之加頌未効薄材望屬車之清塵但馳遠思
想仰宸扆臣無任

賀元豐三年明堂禮畢大赦表

今月二十日樞密院遞到赦書一道以明堂禮畢大
赦天下者已即時集軍州官吏軍民宣讀訖竊以昊
天無聲之載人莫能名先帝罔極之恩物何以稱維
總章之正位秩宗祀之鴻儀可薦至誠用伸昭報中

賀伏惟皇帝陛下躬夙夜之聖質而博古多聞經特起之大猷而虛心廣覽振千齡之墜緒紹三代之遐蹤霈澤之所涵濡太和之所煦嫗華夏蠻貊無一夫不獲其宜草木蟲魚無一物不遂其性爰求祭典用告王功蓋諸儒之說為不經則折衷於孔子而近世之事為非古則取法於周公罷黜異端推明極孝以尊莫大於祖故郊於吉土以配天以本莫重於親故享於合宮以配帝恩義兩得其當情文皆盡其詳徹俎云初均釐甚廣君哉皇矣實難遇之具期之乎煥焉信非常之盛禮臣幸逢熙洽未奉燕閒一前蹕之音四遇親祠之慶青雲多士皆預橋門之聽觀黃髮孤生獨歎周南之留滯仰望旒宸臣不任

賀克伏交趾表

伏觀進奏院報安南招討司已克伏交趾其首領李乾德具表乞降者螻蟻之微自投必死乾坤之大終許更生惟德及於幽遐實均慶於中外中賀伏惟皇帝陛下順稽古憲叙正民彝鬯聲教於四方壹書文於萬國喟海隅之昧俗肆井底之狂謀聖恩所懷凶氣自失雕題交趾心服於威靈大賂南金歲遵於貢職允出止戈之武是稱無敵之仁臣遠守藩維獲聞

捷奏永懷竊抃實倍常情臣伏恨職守所拘不獲稱慶闕庭臣不任

慰慈聖光獻皇太后上仙表

今月二十日太皇太后遣誥奄葉宮闈者承問震驚失容號慟臣某誠悲誠感頓首頓首伏以太皇太后表儀三世德首於人倫保佑兩朝功存於王室遽違孝養未究遐齡無間近踈實均歆慕伏惟皇帝陛下痛貫宸極聖情難居臣伏恨方守印章不獲躬詣闕庭臣無任

謝賜唐六典表

伏蒙聖慈賜臣唐六典一部者冒貢微誠敢徼寵賚獲盈私望特出異恩中謝竊以繼正觀之造邦維開元之稱治財成唐典本庶務於尚書則象周官綴舊聞於經禮行之當世垂及方來伏遇皇帝陛下接五聖之休期振千齡之絕業號令風采早秦漢而不言綱紀文章體唐虞而特起爰因廣覽俯逮遺編俾加鏤板之傳賜及在廷之士顧最踈之庸下忘輒請之妄逾猥荷弁容預均蕃錫敢不自強衰退悉意闕尋竊典故之緒餘少裨寡陋審官儀之委曲益勵疲駑臣不任

元豐類稿卷第二十七

